

В НЕДЕЛЮ АНТИПАСХИ ВЕЧЕРА

Благословившу иерею, глаголем: Христос воскрес: трижды. Таже, Трисвятое. По Отче наш: Господи помилуй. 12. Слава, и ныне: Приидите поклонимся: трижды. И поем вечерню без кафисмы.

На Господи воззвах: поем Стихиры на 6. Праздника 3, Глас 1-й.

Подобен: Прехвальнии мученицы:

По еже из гроба Твоем страшном Жизнодавче востании якоже печатей не разрушил еси Христе, гробных, тако заключенным дверем вшел еси к преславному апостолом Твоим, радостотворя их, и правый Твой Дух подавая им, за безмерную Твою милость.

Фома иже и близнец не бе пришел, егда Ты учеником явился еси Господи. Темже не верова Твоему Воскресению и видевшим Тя вопияше: аще не вложу перста в ребра Его, и гвоздей язвы, не верую яко востал еси.

Якоже хочещи осяжи, Христос Фоме вопияше: вложи руку, и познай Мя кости имуща, и земное тело, и не буди неверен, равно же со иными уверися. Он же возопи: Бог мой и Господь Ты еси, слава востанию Твоему.

И святого минеи подобны 3. Слава: святого.

Аще ли ни: Слава, и ныне: праздника, глас 1-й:

Дверем заключенным, учеником собранным, вшел еси внезапно Всесильне Иисусе Боже наш: и став посреде их, мир дав, исполнил еси Святого Духа: ждати же повелел еси, и никакоже разлучатися от Иерусалима, дондеже облекутся, еже с высоты силою. Темже вопием Ти: Просвещение, и Воскресение, и Мире наш, слава Тебе.

Вход: Свете Тихий:

Прокимен великий, глас 7-й: Кто бог велий, яко Бог наш? Ты еси Бог творяй чудеса.

Стих: Сказал еси в людех силу Твою.

Стих: И рех: ныне начах, сия измена десницы Вышняго.

Стих: Помянух дела Господня.

И паки: Кто бог велий, яко Бог наш? Ты еси Бог творяй чудеса.

Таже ектения: Рцем вси: и Сподоби Господи в вечер сей: и ектения: Исполним вечернюю молитву нашу Господеви.

На стиховне стихира воскресна осмогласника, глас 1-й:

Вечерняя наша молитвы прими Святыи Господи, и подаждь нам оставление грехов: яко Един еси явлей в мире Воскресение.

Стих: К Тебе возведох очи мои ...,

Умилительный: Яко пучина веляя прегрешений моих Спасе, и люте погружаюся согрешеньми моими, даждь ми руку яко Петрови, спаси мя Боже, и помилуй мя.

Стих: Помилуй нас Господи, помилуй нас ...,

Мученичен: Молитвами Господи, всех святых, и Богородицы, Твой мир даждь нам, и помилуй ны, яко Един Щедр.

Слава, и ныне, глас 1-й:

По днех осмих востания Твоего Господи, явился еси учеником Твоим на месте, идеже бяху собрани, и возгласив им: мир вам, неверующему ученику руце показал еси, и пречистое ребро. Он же веровав вопияше Тебе: Господь мой и Бог мой, слава Тебе.

По Трисвятом, тропарь праздника. Аще ли тропарь святого, рцы его прежде. Потом:

Слава, и ныне: Тропарь праздника, глас 7-й

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости.

И отпуст.

Сице убо бывает воследование вечерням во вся недели святых Пентикостии.

От днесь глаголем повечерие малое. И поем канон молебный Пресвятыя Богородицы, во Октоихе. И трипеснцы триоди дне, творение Господина Иосифа. Идеже глаголем трипесно, Богородицы песнь канона оставляется. По Достойно: и по Отче наш: глаголем кондак праздника, во всю Пятдесятницу.

В Литургиях же поется на блаженных, от канона праздника недели, песнь рядовая на кийждо день, со ирмосом на 6, сице: В понедельник, 1. во вторник, 4. в среду, 5. в четверток, 7. В пяток, 8. в субботу, 9.

В ПОНЕДЕЛЬНИК 2-Я СЕДМИЦЫ АНТИПАСХИ НА УТРЕНИ.

Повнегда сотворити иерею начало, Слава Святей: Глаголем: Христос воскрес трижды, тихим гласом.

Сие бо глаголем начало: Христос воскрес: в часех, и Вечернях, и Повечериях, от сея Утрени недели Антипасхи, даже и до Вознесения Господня. [Како убо не известися о Полунощнице, яве яко в келлиах мною сей быти певаемей, понеже убо и тамо сице начало бывает.]

И абие по Христос воскрес: Слава в вышних Богу, и на земли мир: И обычное шестопсалмие. Ектения великая.

Таже, Бог Господь: во глас 7-й:

Тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости. [Трижды].

Сей тропарь глаголется чрез всю седмицу. И стихословим кафисмы две, а третья рядовая на Вечерни: И тако поем Псалтирь до 21 септемвриа.

По 1-м стихословии седален воскресен, глас 1-й:

Гроб Твой Спасе, воины стрегущии, мертви от облистания явльшагося ангела быша, проповедающе женам воскресение: Тебе славим тли потребителя, Тебе припадаем воскресшему из гроба, и единому Богу нашему.

Стих: Господи, да не яростию Твоею обличиши мене, ниже гневом Твоим накажеш мене.

Умилительный: В беззакониих зачат есмь аз блудный, не смею воззрети на высоту небесную, но дерзая на человеколюбие Твое зову: Боже очисти мя грешнаго, и спаси мя.

Стих: Дивен Бог во святых Своих, Бог Израилев.

Мученичен: Страдания похвалою, и венцев достоинством, славнии страстотерпцы одеяшася Тобою Господи: терпением бо ран беззаконныя победиша, и силою Божественною с небесе победу прияша. Тех молитвами свободи от невидимаго врага Спасе, и спаси мя.

Слава, и ныне: Богородичен:

Чудо чудес Благодатная, в Тебе зрящи тварь радуется: зачала бо еси безсеменно, и родила еси неизреченно, Егоже чиноначалия ангелов видети не могут: Того яко Бога моли о душах наших.

Таже чтение в толковании Иоанна Евангелиа.

По 2-м стихословии седален, глас 1-й:

Подобен: Гроб Твой:

Прикоснувшись рукою ребром нестерпимым Близнец Фома, не опалился прикосновением, но пребысть язвы осязая известнее, и вещая нас ради прободенному: Ты мой Господь и Бог мой еси, аще и страсть претерпел еси.

Слава, и ныне: тойже.

Таже, Воскресение Христово видевшие: единожды, и псалом 50.

Сице бо творим до Вознесения Господня.

Начало же творим от ирмосов, ихже и повторяем, поюще и тропари на 6. И святого Минея на 4 тропари. И стихословим Честнейшую. По 9-й песни ексапостиларий празднику, дважды. Слава: святого, аще есть. И ныне: праздника, другий светилен.

Песнь 1.

Ирмос: Поим вси людие, от горкия работы фараони Израиля Изменшему, и во глубине морстей ногами немокрыми Наставльшему, песнь победную: яко прославися.

Днесь весна душам, зане Христос от гроба якоже солнце возсияв тридневный, мрачную бурю отгна греха нашего. Того воспоим, яко прославися.

Царица дней, светоносному дню, дней же царю явственнейши даронося, красит избранныя люди церковныя, непрестанно поя воскресшаго Христа.

Врата смерти Христе, ниже гробныя печати, ниже ключи дверей Тебе противишася: но воскрес предстал еси другом Твоим Владыко, мир даруяй, всяк ум преимущ.

И святого Минея на 4 тропари

Катавасия: Воскресения день, * просветимся, людие: * Пасха, Господня Пасха! * От смерти бо к жизни * и от земли к небеси * Христос Бог нас преведе, * победную поющия.

Песнь 3.

Ирмос: Утверди мене Христе, на недвижимом камени заповедей Твоих, и просвети мя светом лица Твоего: несть бо свят паче Тебе Человеколюбче.

Новыя вместо ветхих, вместо же тленных нетленная, Крестом Твоим Христе совершив нас, во обновлении жизни жительствовати достойно повелел еси.

Во гробе заключен описанною плотию Твоею, неописанный Христе воскресл еси: дверем же заключенным, предстал еси Твоим учеником Всесильне.

Язвы Твоя Христе, яже волею претерпел еси за нас, учеником Твоим сохранив, свидетельство показал еси Твоего славнаго Воскресения.

И святого Минея на 4 тропари

Катавасия: Приидите, пиво пием новое, * не от камене неплодна чудодеемое, * но нетления источник, * из гроба одождивша Христа, * в Немже утверждаемся.

И кондак, и седален святого.

Слава, и ныне: седален празднику, глас 6-й:

Яко посреде учеников Твоих пришел еси Спасе, мир дая им: прииди и к нам и спаси нас.

Песнь 4.

Ирмос: Велия тайна Твоего Христе, смотрения: сию бо свыше провидя, богозрительно Аввакум, изшел еси, вопияше Тебе, во спасение людей Твоих Человеколюбче.

Желчи убо вкуси, древнее вкушение исцеляя, ныне же с сотом меда, просвещение подая Христос праотцу, и Свое сладкое Причастие.

Радуетися испытаямъ: темже Человеколюбче, на сие повелеваеши Фоме, простирая неверующему ребра, мірови уверяя Твое Христе, тридневное Востание.

Богатство почерп от сокровища некрадомаго Божественнаго, Благодетелю, копием прободеннаго Твоего ребра, премудрости и разума наполняет мір близнец.

Твой всеблаженный хвалится язык, о близнче! Первый бо благочестно проповедует Жизнодавца Иисуса, Бога же и Господа, от осязания исполнься благодати.

И святого Минея на 4 тропари

Катавасия: На Божественней стражи * богоглаголивый Аввакум * да станет с нами и покажет * светоносна Ангела, * ясно глаголюща: * днесь спасение миру, * яко воскрес Христос, * яко Всесилен.

Песнь 5.

Ирмос: От нощи утреннююще поем Тя, Христе, Отцу Собезначальна, и Спаса душ наших: мир мірови подаждь, Человеколюбче.

Представ другом скорбящим Спас, пришествием всю отъемлет скорбь, и играти воздвизает Своим Воскресением.

О воистинну похваляемаго Фомы страшнаго начинания! Дерзостно бо осяза ребра, Божественным огнем блистающая.

Неверие Фомино, веры родительное нам показал еси: Ты бо вся премудрости Твоею промышляеши полезно Христе, яко Человеколюбец.

И святого Минея на 4 тропари

Катавасия: Утренюем утреннюю глубокую * и вместо мира песнь принесем Владыце, * и Христа узрим правды Солнце, * всем жизнь возсияющая.

Песнь 6.

Ирмос: Пророка спасл еси от кита Человеколюбце, и мене из глубины предгрешений возведи, молюся.

Фомы не оставил еси Владыко, погружаема глубинное неверия, длани протер на испытание.

Спас наш глаголаше: осязавше мя видите кости и плоть носяща, Аз не пременихся.

Ребра осяза, и веровав позна Фома, не сый в первом входе Твоем, Спасе наш.

И святого Минея на 4 тропари

Катавасия: Снизшел еси в преисподняя земли * и сокрушил еси верей вечныя, * содержащая связанныя, Христе, * и тридневен, яко от кита Иона, * воскресл еси от гроба.

Кондак, глас 8-й:

Любопытною десницею, жизнеподательная Твоя ребра Фома испыта Христе Боже: созаклученным бо дверем яко вшел еси, с прочими апостолы вопияше Тебе: Господь еси и Бог мой.

Икос: Кто сохрани ученичу длань тогда неопалиму, егда ко огненным ребром приступи Господним? Кто даде ей дерзость, и возможе осязати пламенную кость, всяко неосязжимую? Аще бо не бы ребро силу подало брэнней деснице, како можаше осязати, страданьми поколебавшая яже выше, и яже низу? Сия благодать Фоме дадеся, еже сия осязати, Христови же вопити: Господь еси и Бог мой.

Песнь 7.

Ирмос: Образу служити мусикийскому согласию созывающу люди, от песней Сионских поюще отчески отроцы Давидовы, мучителево разориша злочестивое веление, и пламень в росу преложиша, песнь воспевающе: превозносимый отцев и наш Боже, благословен еси.

Яко первый есть дней и Господьственный светоносный сий, воньже радоватися достойно новым и божественным людем с трепетом: приносит бо и века образ, яко осмица совершая будущаго, превозносимый отцев и наш Боже, благословен еси.

Един дерзнувший, неверною же верою облагодетельствовавший нас Фома близнец, решит убо мрачное неведение всех концов, верным неверствием, себе же венец плетет яве глаголя: Ты еси Господь, превозносимый отцев и наш Боже, благословен еси.

Не всеу усумневся Фома о востании Твоем, не низложися: но несумнительное тщашеся показати сие Христе, всем языком. Отонудуже неверием уверив, всех научи глаголати: Ты еси Господь превозносимый отцев и наш Боже, благословен еси.

Со страхом руку Фома в ребра Твоя живоносная, Христе, вложив, трепетен ощути действо, Спасе, сугубое, двема естествома в Тебе соединяемыми неслиянно, и верою взываше глаголя: Ты еси Господь превозносимый отцев и наш Боже, благословен еси.

И святого Минея на 4 тропари

Катавасия: Отроки от печи избавивый, * быв Человек, * страждет яко смертен, * и страстию смертное * в нетления облачит благолепие, * Един благословен * отцев Бог и препрославлен.

Песнь 8.

Ирмос: В пламени огненне горящая печи Сохраншаго дети, и во зраце ангела Снизшедшаго к ним, пойте Господа, и превозносите Его во веки.

Возжелевый Твое радостное видение, прежде не вероваше Фома: сподобься же того, Бога и Господа Тя нарицаше Владыко, Егоже превозносим во вся веки.

Претерпевшаго Фомино неверие, и показавшаго ребра, и того дланию осязана бывша, пойте Господа, и превозносите Его во веки.

Твое неудобное сокровище, утаенное нам отверзе Фома: богословив бо языком богоносным, пойте Господа, глаголаше, и превозносите Его во вся веки.

И святого Минея на 4 тропари

Катавасия: Сей нареченный и святой день, * Един суббот Царь и Господь, * праздников праздник * и торжество есть торжеств: * воньже благословим Христа во веки.

И стихословим Честнейшую

Песнь 9.

Ирмос: Тебе светлую свещу, и Матерь Божию, пречудную Славу и высшую всех тварей, песнями величаем.

Твой светлый день и пресветлый Христе, всесветлую благодать, воньже красный добротою учеником Твоим предстал еси, в песнях величаем.

Тебе брэнною дланию осязаема в ребра, и не опаливши сию, огнем невестественнаго Божественнаго существа, в песнях величаем.

Тя яко Бога из гроба воскресша Христа, не очима видевше, но сердечною любовию веровавшие, песнями величаем.

И святого Минея на 4 тропари

Катавасия: Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Екзапостилларий, глас 3-й:

Подобен: Небо звездами:

Моих удов рукою твоею испытывай язвы, не неверуй Ми Фома, уязвленному тебе ради, со ученики единомудрствуй, и живущаго проведуй Бога. [Дважды]

Слава: святаго, аще есть и ныне:

Днесь весна благоухает, и новая творь ликует. Днесь взимаются ключи дверей, и неверия Фомы друга вопиюща: Господь и Бог мой.

На хвалитех поставим стихиры 3 Осмогласника, на 4. Глас 1-й:

Поем Твою Христе спасительную страсть, и славим Твое Воскресение. [Дважды.]

Умилительный: Иный тебе мир душе ожидает, и Судия хочет твоя обличити тайная и лютая. Не пребуди убо в здешних, но предвари вопиющи Судии: Боже, очисти мя, и спаси мя.

Мученичен: Страстотерпцы Христовы, приидите людие, вси почтим песньми и пении духовными, светила мира, и проповедники веры, источник приснотекущий, из негоже истекают верным исцеления. Тех молитвами, Христе Боже наш, мир даруй миру, и душам нашим велию милость.

Слава, и ныне: глас 1-й:

Фома глаголемый Близнец не бе с ними, егда вшел еси Христе заключенным, дверем, темже и не вероваше реченным ему, от неверия в веру известуя: не несподобил же еси блаже, показати ему пречистое ребро Твое, и руку и ногу язвы. Он же осязав и виде, исповеда Тя быти Бога не нага, и Человека не проста, и вопияше: Господь мой и Бог мой, слава Тебе!

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры глас 2-й.

Подобен: Доме Евфрафов:

Устнами чистыми пойте, * со ангелы человецы, * Воскресшаго * тридневно из гроба, * и мир совоздвигшаго.

Стих: Похвали Иерусалиме Господа, хвали Бога твоего Сионе.

Явился еси священным Твоим * Спасе апостолом, * дверем заключенным, * теми обновляя нам * Божественный Дух Твой.

Стих: Яко укрепи верей врат твоих, и благослови сыны твоя в тебе.

Ныне Тя Всецарю, * видевшие не очима, * но сердечною * любовию Бога веровавшие, * в пениях величаем.

Слава: святаго, аще есть. И ныне: глас 1-й:

Учеником сомнящимся, во осмый день предста Спас, идеже бяху собрани, и мир дав, Фоме возопи: прииди апостоле, осяжи длани, в нихже гвоздия вонзоша. О доброе неверие Фомино, верных сердца в познание приведе, и со страхом возопи: Господь мой и Бог мой, слава Тебе!

Таже, Благо есть исповедатися Господеви, и пети имени Твоему, Вышнии, возвещати завтра милость Твою, и истину Твою на всяку ночь.

Трисвятое. И по Отче наш:

Тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости.

Таже ектения: Помилуй нас Боже:

Посем иерей: Сый благословен Христос Бог наш: Лик: Утверди Боже: И абие совокупляем час первый трипсалмный, по обычаю. Тропарь и кондак праздника, и святого. Аще же святого на 4, кондак глаголется праздника непременно: а святого кондак не глаголется. И бывает совершенный отпуст. И обычная лития в притворе.

Начинаем же от днесь и междочасия часов, по последовавшему уставу. Подобае же ведати, якоже написанъ зде воследование в Неделю вечера во светильничном, и в понедельник во Утрени: сие да бывает во всех седмицах до Вознесения Господня, изменяемым стихирам Осмогласника, и седальном по обычаю.

НА ЛИТУРГИИ

Блаженна Троица, песнь 1-й праздника, на 6. И от сего дне во всю Пятидесятницу.

Днесь весна душам, зане Христос от гроба якоже солнце возсияв тридневный, мрачную бурю отгна греха нашего. Того воспоим, яко прославися. [Дважды]

Царица дней, светоносному дню, дней же царю явственнейши даронося, красит избранныя люди церковныя, непрестанно поя воскресшаго Христа. [Дважды]

Врата смерти Христе, ниже гробныя печати, ниже ключи дверей Тебе противишася: но воскрес предстал еси другом Твоим Владыко, мир даруяй, всяк ум преимущ. [Дважды]

По входе тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости. [трижды].

И храма Богородицы, и храма святого. Посем настоящего святого, аще есть. Также кондак храма святого. Слава: святого:

И ныне: праздника: Кондак, глас 8-й:

Любопытною десницею, жизнеподательная Твоя ребра Фома испыта Христе Боже: созаключенным бо дверем яко вшел еси, с прочими апостолы вопияше Тебе: Господь еси и Бог мой.

Храма же Христова, и Богородицы кондак, во всю Пятидесятницу не глаголем.

Прокимен Апостола, глас 3-й: Велий Господь наш, и велия крепость Его, * и разума Его несть числа.

Стих: Хвалите Господа яко благ псалом: Богови нашему да усладится хваление.

Апостол Деяний, зачало 9-е. [Деян. 3, 19 – 26.]

Рече Петр к людям: покайтесь и обратитесь, да очиститесь от грех ваших, Яко да придут времена прохладна от лица Господня, и послет пронареченнаго вам Христа Иисуса, Егоже подобает небеси убо прияти даже до лет устроения всех, яже глагола Бог усты всех святых Своих пророк от века. Моисей убо ко отцем рече: яко Пророка вам воздвигнет Господь Бог ваш от братии вашей, яко мене: Того послушайте по всему, елика аще речет к вам: Будет же, всяка душа, яже аще не послушает Пророка онаго, потребится от людей. И вси же пророцы от Самуила и иже по сих, елицы глаголаша, такожде предвозвестиша дни сия.

Вы есте сынове пророк и завета, егоже завета Бог ко отцем вашим, глаголя ко Аврааму: и о семени твоём возблагодарятся вся отечествия земная. Вам первее Бог, воздвигый Отрока Своего Иисуса, посла Его благодаряща вас, во еже отвратитися вам коуждо от злоб ваших.

Аллилуиа, глас 8-й: Приидите возрадуемся Господеви, воскликнем Богу Спасителю нашему.

Стих: Яко Бог велий Господь, и Царь велий по всей земли.

Евангелие Иоанна, зачало 6-е. [Ин. 2, 1 – 11.]

Брак бысть в Кане Галилейстей: и бе Мати Иисусова ту. Зван же бысть Иисус и ученицы Его на брак. И недоставшу вино, глагола Мати Иисусова к Нему: вина не имут. Глагола Ей Иисус: что (есть) Мне и Тебе, Жено? не у прииде час Мой. Глагола Мати Его слугам: еже аще глаголет вам, сотворите. Беху же ту водоноси каменни шесть, лежаще по очищению иудейску, вмещающий по двема или трием мерам. Глагола им Иисус: наполните водоносы воды. И наполниша их до верха. И глагола им: почерпите ныне и принесите архитриклинови. И принесоша. Якоже вкуси архитриктин вина бывшаго от воды, и не ведаше, откуда есть: слуги же ведяху почерпшии воду: пригласи жениха архитриктин. И глагола ему: всяк человек прежде доброе вино полагает, и егда ушуются, тогда худшее: ты (же) соблюл еси доброе вино доселе. Се сотвори начаток знаменiem Иисус в Кане Галилейстей и яви славу Свою: и вероваша в Него ученицы Его.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскрес тридневен от гроба, и мертвыя воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Похвали Иерусалиме Господа, хвали Бога Твоего Сионе.

Аллилуиа, [трижды]